



18. august 2011

Inatsisartut suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut Apeqqut:**

1. Tuttuliisoqartinnagu aammalu umimmaliisoqartinnagu imaluunniit taamaaliissamaarnermut atatillugu nunap naasoqassusaa misissorneqartarpa aammalu uumasuliiffiusimasuni naasoqassuseq qanoq annertutigisumik sunnerneqarnerseq pillugu Naalakkersuisut misissuititsippat?
2. Uumasuliiffiusimasuni naasoqassuseq misissuiffigiumallugu Naalakkersuisut qanoq annertutigisumik aningaasaliisimappat? Apeqqutip akineqarnissaanut silaannaap allanngorneranut qanoq tamanna sunniuteqarnerseq ilanngullugu nassuiaatigeqquneqarpoq.
3. Naalakkersuisut ilisimatitsissutigisinnaavaat tuttuliisoqarsimatillugu qanoq piumasagaateqartoqarsimanersorq?  
Tassunga assersuutigalugu:  
-tuttut nujuitsut amerlassusaat.  
-Killilersimaarnissai qanutut.  
Kumattannginnissaannut napparsimalinnginnissaannullu akiuussutissatigut tunngasut.
4. Kimit aammalu qanoq akuersissutit ingerlanneqartarpat tunngavissallu aallaavigineqartut suut atorineqartarpat?
5. Nakkutilliineq qanoq ingerlanneqartarpa ilanngullugu akiuussutissat pillugit qanorlu akulikitsigisumik tamanna nakkutigineqarlunilu piumasagaatitaqarpa?
6. Naalakkersuisunit maleruagassat malinneqanngitsutut nalilerunikkit qanoq iliuuseqartoqassamaarpa?
7. Kujataani tuttuutigineqartut qanoq amerlatigaat aammalu nunami naasoqassutsimut naapertuuttutut taasariaqarpa?

(Kim Kielsen, Siumut)

**Tunngavilersuut:**

Ukiut ingerlanerini arlaleriarluni tuttuliisoqartarlunilu umimmaliisoqartarpoq. Tamanna imminut pilersorniarnermut neqissaqarniarnermullu assorsuaq pingaaruteqarpoq pissaganartuullunilu.

Uumasogatigiit aammalu naasoqatigiinnut tamanna sunniuteqarnerseq paasissallugu pissusissamisoorpoq, soorlu aammalu pinngortitap allanngorartuunerata allanngorfii paasisaqarfigissallugu.

Isumaqarpunga qangarsuaaniillu naasut aammalu pinngortitap ilusaata qanoq sunnerneqartiginera ilisimasaqarfigissallugu pingaaruteqartuusoq qulakkeerniartariaqarparpullu eqqussuisimanerup nunap allanngorartuuneranut pisuussuteqarluartuuneranullu siunertaanngitsumik kinguneqartinneqarnissaa.

Namineq misilittakkakka aallaavigalugit oqaatigisinnaavara tuttu kumaqarnerat annertunerulersimasutut taajumagakkut soorlu aamma ilaatigut nerisarlussimasutut isikkoqarsinnaasartut maluginiartarlugu. Tamanna erumarpoq eqqarsaatersuuteqarfiginarlunilu.

Kissaatigaara apequteqaatika ullut suliffiusut qulit iluanni akineqareersimanissaat.